



ZASTUPNICA STRANKE ZA BOSNU I  
HERCEGOVINU U SKUPŠTINI KANTONA  
SARAJEVO  
FATIMA GAVRANKAPETANOVIĆ-  
SMAILBEGOVIĆ  
fatima.smailbegovic@gmail.com

BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
SKUPŠTINA KANTONA

**INICIJATIVA**  
za osiguranje finansijskih sredstava za liječenje oboljelih  
od upalnih reumatskih bolesti u Kantonu Sarajevo

Ovim putem pokrećem inicijativu za osiguranje finansijskih sredstava za liječenje oboljelih od upalnih reumatskih bolesti u Kantonu Sarajevo . Inicijativu predlažem kroz dvije paralelne aktivnosti koje provodi Ministarstvo zdravstva Kantona Sarajevo .

**Obrazloženje inicijative :**

Predmetnu inicijativu pokrećem u koordinaciji sa nevladinim organizacijama i članovima porodica oboljelih od upalnih reumatskih bolesti .

Reumatska oboljenja su oboljenja sa naglašenim socijalno-ekonomskim posljedicama.

BiH je jedina zemlja u regionu koja nema zvaničnog registra za oboljele od upalnih reumatskih bolesti. Gruba je procjena prema međunarodnoj prevalenci (ukupan broj oboljelih osoba unutar neke populacije u datom vremenskom trenutku u odnosu na cijelu populaciju ), a koja se odnosi samo za reumatoidni artritis (predstavnik upalnih reumatskih bolesti) kreće se između 0,4-1,3%, prevedeno na ukupan broj stanovnika u BiH (cca 3.8 mil.KM) bi značila oko cca 50.000 oboljelih. Procjena je da u Kantonu Sarajevo postoji oko 4.000 - 5.000 stanovnika oboljelih od reumatoidnog artritisa, a oko 10.000 od svih reumatskih bolesti (RA, PSA, AS, OA).

Upalne reumatske bolesti ( pored reumatoidnog artritisa u istu grupu spadaju ankilozantni spondilitis i psorijatični artritis – oboljenja iste ili slične etiopatogeneze ali sa manifestacijom na zglobovima kičme ili udruženo uz pojavu psorijaze na koži. Reumatoidni artritis je treći uzrok invaliditeta u svijetu. Ukoliko se ne otkriju na vrijeme i ne liječe po evropskim i svjetskim smjernicama, zdravi ljudi od uspostavljene dijagnoze nakon 10 godina postaju u većini slučajeva radno nesposobni sa trajnim zdravstvenim oštećenjima.

Reumatoidni artritis ne bira godine. Od njega obolijevaju u velikom broju radno sposobni ljudi u dobi od 20-40 godina starosti. Posljedice neliječenja su česte hospitalizacije, banjski tretmani, fizijatrijski tretmani i na koncu osoba koja nije radno sposobna mora u penziju.

U liječenju upalnih reumatskih bolesti postoji liječenje tzv. konvencionalnim lijekovima koji podrazumijevaju lijekove s kojima se rješavaju simptomi boli i djelomično sprječava dalje napredovanje bolesti. Neki od njih su odavno dostupni npr u Republici Srpskoj i na esencijalnoj su listi lijekova.

Na esencijalnoj listi lijekova u Federaciji BiH još uvijek nisu na listi, a pojašnjenja radi bez esencijalne liste, prosječni mjesečni troškovi za ovu grupu lijekova iznose 350 -500 KM. Smatram da bazni i osnovni lijek u liječenju ove bolesti treba da se nađe na dostupnoj -besplatnoj listi lijekova za pacijente u KS i za indikaciju Reumatoidnog artritisa i ostalih reumatskih bolesti, a ne kao što je to trenutno slučaj, samo za onkološke i gastroenterološke pacijente .

Međutim, ako govorimo o pametnom, savremenom liječenju, modernom i najučinkovitijom terapijom, onda cu prezentirati i drugi dio moje inicijative, a to je BIOLOSKA TERAPIJA .

U svijetu već više od 25 godina postoje lijekovi koji daju odlične rezultate i koji mogu dovesti do zaustavljanja progresije bolesti i nazivaju se biološki lijekovi. Terapija biološkim lijekovima na godišnjem nivou za jednog pacijenta iznosi približno 12 – 15000 KM.

Spomenuti iznosi sigurno nisu veliki u odnosu na uspjeh terapije, jer je rezultat vidljiv već nakon 3 mjeseca primjene, a nekada i ranije. Međutim, liječenje i „držanje bolesti pod kontrolom“ zahtjeva kontinuiranu primjenu biološkog lijeka kako bi se pacijent doveo u stanje tzv. remisije ili odsustva znakova i simptoma aktivnosti bolesti. Dodatan razlog da se ova inicijativa u praksi provede jeste činjenica da državu skuplje košta ne liječenje reumatološkog pacijenta, bolovanja, česte hospitalizacije, rane penzije, invalidnine, tuđe njege i sl).

U zemljama u regionu – u Sloveniji, Hrvatskoj, Srbiji, Crnoj Gori i Makedoniji govorimo o nekoliko hiljada oboljelih od upalnih reumatskih bolesti koji se uspješno liječe biološkim lijekovima.

Ali da ne idemo dalje od naše države, od marta 2014 godine Fond zdravstvenog osiguranja RS odobrio je sredstva za financiranje biološke terapije i za liječenje ne malignih oboljenja osiguranim licima kojima je neophodna ova terapija. Do današnjeg dana, govorimo o približno 1000 zbrinutih pacijenata samo sa dijagnozom upalnih reumatskih bolesti. Dakle ako živite u Istočnom Sarajevu u Republici Srpskoj, možete dobiti biološki lijek, a na samo 2 kilometara dalje, u Sarajevu, nažalost, nemate mogućnost pristupa ovoj terapiji. A da paradoks bude još veći, Kanton Sarajevo ima jedva 35-42 oboljela, uključujući djecu koja su prešla na odrasle .

Drugi pozitivan primjer je i odobravanje finansijskih sredstava za liječenje oboljelih od upalnih reumatskih bolesti u Kantonu Tuzla, gdje je na zahtjev Ministarstva zdravstva Kantona Tuzla, u finansijski proračun za 2017 godinu uvršteno i financiranje 50-ak, a 2022. i 120 novih, najurgentnijih pacijenata za liječenje biološkom terapijom.

Vrijeme je da se Reumatološki pacijenti riješe sistemski, a ne projektno i ad hoc aktivnostima

Dakle, podnosim inicijativu da se osigura uvrštavanje na listu liječenja biološkom terapijom preko Ministarstva zdravstva i nadležnih fondova, pacijenata sa ovom dijagnozom, kroz uvrštavanje lijekova na esencijalnu listu i odobravanje biološke terapije za liječenje i ove bolesti, a ne samo za onkološke i gastroenterološke, kako je to slučaj trenutno u KS.

Osnovna – bazna terapija je od velikog značaja za svakog oboljelog.

Liječenje sa biološkim lijekovima , ne podrazumijeva terapiju za sve oboljele – samo najurgentniji bolesnici po strogim kriterijima i pravilima struke a prema EULAR kriterijima – pripremali bi se za ovakvu vrstu terapije!

Bolest ovih pacijenata ne miruje, ona svakim danom napreduje i sa daljim odgađanjem i ne rješavanjem liječenja, postaju kako kažu, direktna odgovornost Zavoda zdravstvenog osiguranja FBiH, kao i Kantona Sarajevo, pa čak i ostalih kantona!!

Ministar Vranić je još u martu prošle godine na Skupštini KS najavio povećanje broja pacijenata koji će se liječiti biološkom terapijom, tako da je ova inicijativa samo vjetar u leđa tom ministrovom obećanju!

Sigurnost i interesi pacijenata moraju imati prioritet, a ne politički interesi i pravljenje ušteta preko bolesnih. Nema niti jednog razloga da se ne osigura sve što predlažem ovom inicijativom, jer sigurno u budžetu od 1,2 milijarde KM ima dovoljno prostora da se osigura liječenje ovih zaista teških bolesnika, naših sugrađana.

Tražim na ovoj sjednici izjašnjenje na ovu moju inicijativu i ako ona danas bude usvojena, a nema razloga da ne bude, tražim izvještaj o realizaciji inicijative u roku od 60 dana !

Hvala !

Sarajevo, 8.2.2023.godine

Inicijativu podnosi :  
Fatima Gavrankapetanović-Smailbegović